

全唐文

201704

201704

201704

20170 2 201704

201704



欽定全唐文卷三百四十九目錄

李白 三

春夜宴從弟桃花園序

早春於江夏送蔡十還家雲夢序


春於姑熟送趙四流炎方序

暮春於江夏送張祖監丞之東都序

早夏於將軍叔宅與諸昆季送傅八之江南序

夏日陪司馬武公與羣賢宴姑熟亭序

夏日諸從弟登汝州龍興閣序



秋日於太原南柵餞陽曲王贊公賈少公石艾尹

少公應舉赴上都序

秋夜於安府送孟贊府兄還都序

秋於敬亭送從姪嵩遊廬山序

送戴十五歸衡嶽序

冬日於龍門送從弟京兆參軍令問之淮南覲省

序

冬夜於隨州紫陽先生餐霞樓送烟子元演隱仙

城山序

北斗延生經註解序

澤畔吟序

餞副大使李藏用移軍廣陵序

奉餞十七翁二十四翁尋桃花源序

江夏送林公上人遊衡嶽序

金陵與諸賢送權十一昭夷序

江夏送倩公歸漢東序

送黃鐘之鄱陽謁張使君序

欽定全唐文卷三百四十九

李白 三

春夜宴從弟桃花園序

夫天地者萬物之逆旅光陰者百代之過客而浮生若夢
爲歡幾何古人秉燭夜遊良有以也況陽春召我以烟景
大塊假我以文章會桃李之芳園序天倫之樂事羣季俊
秀皆爲惠連吾人詠歌獨慙康樂幽賞未已高談轉清開
瓊筵以坐花飛羽觴而醉月不有佳作何伸雅懷如詩不
成罰依金谷酒數

早春於江夏送蔡十還家雲夢序

吾觀蔡侯奇人也爾其才高氣遠有四方之志不然何周
流宇宙太多耶白遐窮冥搜亦已早矣海草三綠不歸國
門又更逢春再結鄉思一見夫子冥心道存窮朝晚以作
宴驅烟霞以輔賞朗笑明月時眠落花斯遊無何尋告睽
索來暫觀我去還愁人乃浮漢陽入雲夢鄉柰云叩歸魂
亦飛且青山綠楓累道相接遇勝因賞利君前行旣非遠
離曷足多歎秋七月結遊鏡湖無憊我期先子而往敬慎
好去終當早來無使耶川白雲不得復弄爾鄉中廖公及

諸才子爲詩略謝之

春於姑熟送趙四流炎方序

白以鄒魯多鴻儒燕趙饒壯士蓋風土之然乎趙少公才
貌瓌雅志氣豪烈以黃綬作尉泥蟠當塗亦猶雞棲鶴籠
不足以窘束鸞鳳耳以疾惡抵法遷於炎方辭高堂而墜
心指絕國以搖恨天與水遠雲連山長惜光景於頃刻開
壺觴於洲渚黃鶯曉別愁聞命子之聲青楓暝色盡是傷
心之樹然自吳瞻秦日見喜氣上當攫玉弩摧狼狐洗清
天地雷雨必作冀白日迴照丹心可明巴陵半道坐見還

吳之棹令雪解而松柏振色氣和而蘭蕙開芳僕西登天
門望子於滄江之上吾賢可流水其道浮雲其身通方大
適何往不可何戚戚於路歧哉

暮春於江夏送張祖監丞之東都序

吁咄哉僕書室坐愁亦已久矣每思欲遐登蓬萊極目四
海手弄白日頂摩青穹揮斥幽憤不可得也而金骨未變
玉顏已緇何常不捫松傷心撫鶴歎息誤學書劍薄遊人
間紫禁九重碧山萬里有才無命甘於後時劉表不用於
禰衡暫來江夏賀循喜逢於張翰且樂船中遇達人張侯

大雅君子統泛舟之役在清川之湄談元賦詩連興數月
醉盡花柳賞窮江山王命有程告以于邁烟景晚色慘爲
愁容繫飛帆於半天泛淥水於遙海欲去不去更開芳樽
樂雖寰中趣逸天外平生酣暢未若此時至於清談浩歌
雄筆麗藻笑飲醪酒醉揮素琴余實不媿於古人也揚袂
遠別何時歸來想洛陽之秋風將鱸魚以相待詩可贈遠
無乃闕乎

早夏於將軍叔宅與諸昆季送傅八之江南序

易曰觀乎人文以化成天下窮此道者其惟傅侯耶侯篇

章驚新海內稱善五言之作妙絕當時陶公媿田園之能
謝客慙山水之美佳句籍籍人爲美談前許州司馬宋公
蘊冰清之姿重傅侯玉潤之德妻以其子鳳凰于飛潘楊
之好斯爲睦矣僕不佞也忝於芳塵宴同一筵心契千古
清酌連曉元談入微歡攜無何旋告睽拆將軍叔英略蓋
古英明洞神天王貴宗誕育賢子八龍增秀以列次五色
相輝而有文會言高樂曉餞金門洗德絃觴怡顏朱明草
木已盛且江嶂若畫賞盈前途自然屏間坐遊鏡裏行到
霞月千里足供文章之用哉征帆空懸落日相迫二季揮

翰詩其贈焉

夏日陪司馬武公與羣賢宴姑熟亭序

通驛公館南有水亭焉四薨翬飛巉絕浦嶼蓋有前攝令
河東薛公棟而宇之今宰隴西李公明化開物成務又橫
其梁而閣之晝鳴閒琴夕酌清月蓋爲接輶軒祖遠客之
佳境也製置旣久莫知何名司馬武公長材博古獨映方
外因據胡牀岸幘嘯詠而謂前長史李公及諸公曰此亭
跨姑熟之水可稱爲姑熟亭焉嘉名勝概自我作也且夫
曹官紱冕者大賢處之若遊青山臥白雲逍遙偃傲何適

不可小才居之窘而自拘悄若桎梏則清風朗月河英嶽
秀皆爲棄物安得稱焉所以司馬南鄰當文章之旗鼓翰
林客卿揮辭鋒以戰勝名教樂地無非得俊之場也千載
一時言詩記志

夏日諸從弟登汝州龍興閣序

夫槿榮芳園蟬嘯珍木蓋紀乎南火之月也可以處臺榭
居高明吾之友于順此意也遂卜精勝得乎龍興留寶馬
於門外步金梯於閣上漸出軒戶遐瞻雲天晴山翠遠而
四合暮江碧流而一色屈指鄉路還疑夢中開襟危欄宛

若空外嗚呼屈宋長逝無堪與言起予者誰得我二季當揮爾鳳藻挹予霞觴與白雲老兄俱莫負古人也

秋日於太原南柵餞陽曲王贊公賈少公石艾尹少公應舉赴上都序

天王三京北都居一其風俗遠蓋陶唐氏之人歟襟四塞之要衝控五原之都邑雄藩劇鎮非賢莫居則陽曲丞王公神仙之胄也爾其學鏡千古知周萬殊又若少府賈公以述作之雄也鰲弄筆海虎攬辭場又若石艾尹少公廊廟之器口折黃馬手揮青萍咸道貫於人倫名飛於日下

實難沈屈永懷青霄劍有隱而氣衝七星珠雖潛而光照
萬壑今年春皇帝有事千畝湛恩八埏大搜羣才以緝邦
政而王公以令宰見舉賈公以王霸昇聞海激佇乎三千
天飛期於六月必有以也豈徒然哉有從兄太原主簿舒
才華動時規謀匠物乃駢翠幕筵虹梁瓊羞霞開羽觴電
舉然後抗目遠覽憑軒高吟汾河鏡開漲藍都之氣色晉
山屏列橫朔塞之郊原屏俗事於煩襟結浮歡於落景俄
而皓月生海來窺醉容黃雲出關半起秋色數君乃輟酌
慷慨搖心促裝望丹闕而非遠揮玉鞭而且去白也不敏

先鳴翰林幸叨玳瑁之筵敢竭麒麟之筆請各揆韻賦詩
寵行

秋夜於安府送孟贊府兄還都序

夫士有飾危冠佩長劔揚眉吐諾激昂青雲者莫不誇炫
意氣託交王侯若告之急難乃十失八九我義兄孟子則
不然耶道合而襟期暗親志乖而肝膽楚越鴻鸞鳳立不
循常流孔明披書每觀於大略少君讀易時作於小文四
方賢豪眩然景慕雖長不滿七尺而心雄萬夫至於酒情
中酣天機俊發則談笑滿席風雲動天非嵩邱騰精何以

金定公序
卷三十四
及此白以弱植早飲香名況親承光輝恩甚華萼他鄉此
別誰無恨耶時林風吹霜散下秋草海鴈嘶月孤鶴翔雲
驚魂動骨戛瑟落涕抗手緬邁傷如之何且各賦詩以寵
行路

秋於敬亭送從姪嵩遊廬山序

余少時大人令誦子虛賦私心慕之及長南遊雲夢覽七
澤之壯觀酒隱安陸蹉跎十年初嘉興季父謫長沙西還
時子拜見預飲林下嵩乃稚子嬉遊在傍今來有成鬱有
秀氣吾衰久矣見爾慰心申悲道舊破涕爲笑方告我

涉西登香鑪長山橫蹙九江卻轉瀑布天落半與銀河爭
流騰虹奔電激射萬壑此宇宙之奇詭也其上有方湖石
井不可得而窺焉羨君此行撫鶴長嘯恨丹液未就白龍
來遲使秦人著鞭先往桃花之水孤負夙願慙未歸於名
山終期後來攜手五嶽情以送遠詩寧闕乎

送戴十五歸衡嶽序

白上撥元古中觀人世下察交道海內豪俊相識如浮雲
自謂德參夷顏才亞孔墨莫不名由口進實從事退而風
義可合者厥惟戴侯戴侯居長沙稟湖嶽之氣少長咸洛

窺霸王之圖精微可以入神懿重可以崇德謨猷可以尊
主文藻可以成化兼以五才統以四美何往而不濟也其
二三諸昆皆以才秀擢用辭翰炳發昇聞天朝而此君獨
潛光後世以期大用鯤海未躍鵬霄悠然不遠千里訪余
以道邛國之秀有廖侯焉人倫精鑒天下獨立每延以宴
謔許爲通人獨孤有鄰及薛公咸亦以爲信然矣屬明主
未夢且歸衡陽憩祝融之雲峯弄茱萸之湍水軒騎糾合
祖於魏公之林亭笙歌鳴秋劒舞增氣沉江葉墜綠沙鴻
冥飛登高送遠使人心醉見周張二子爲論平生雞黍之

期當速赴也

冬日於龍門送從弟京兆參軍令問之淮南覲省

序

紫雲仙季有英風焉吾家見之若衆星之有月貴則天王
之令弟寶則海嶽之奇精遊者所謂風生玉林清明蕭灑
真不虛也常醉目吾曰兄心肝五臟皆錦繡耶不然何開
口成文揮翰霧散因撫掌大笑揚眉當之使王澄再聞亦
復絕倒觀夫筆走羣象思通神明龍章炳然可得而見歲
十二月拜省於淮南思白華之長吟眺黃雲之晚色目斷

心盡情懸高堂傾蘭醕而送行赫金鞍而照地錯轂蹲野
朝英滿筵非才名動時何以及此日落酒罷前山陰烟殷
勤惠言吾道東坐想洛橋春色先到淮城見千條之綠柳
折一枝以相贈則華萼情在吾無恨焉羣公賦詩以光榮
餞

冬夜於隨州紫陽先生餐霞樓送烟子元演隱仙

城山序

吾與霞子元丹烟子元演氣激道合結神仙交殊身同心
誓老雲海不可奪也歷行天下周求名山入神農之故鄉

得胡公之精術胡公身揭日月心飛蓬萊起餐霞之孤樓
鍊吸景之精氣延我數子高談混元金書玉訣盡在此矣
白乃語及形勝紫陽因大誇仙城元侯聞之乘興將往別
酒寒酌醉青田而少留魂夢曉飛渡淶水以先去吾不凝
滯於物與時推移出則以平交王侯遁則以俯視巢許朱
紱狎我綠蘿未歸恨不得同棲烟林對坐松月有所款然
銘契潭石乘春當來且抱琴臥花高枕相待詩以寵別賦
而贈之

北斗延生經註解序

原夫太素未分無光無象混黃成化有始有終則昇清而
滯穢輔善而貶凶置百二十曹局列於冥府造三十六部
經祕於瓊宮度天人之有道啓含識之不矇余歎曰莫非
三界十方天地人倫斯所以爲道之紀也今竊見聖世幸
逢豐年得遇皇朝將道德而安家邦效勳華而育黎庶而
況天下晏然太元彰耀今卽啓有道之心者扶風氏等志
奉日新慕眞歲久禱天祐而制凶魔求師訓而傳道要遂
得遇崆峒山元元真人明龍漢之元文演赤文之妙奧教
符十洞三乘化列萬機一義註解北斗延生經一卷上則

有飛神金闕中則有保國寧家次則有延齡益壽普度有情之品同登無礙之門於是謹作斯文用題經首李白謹序

澤畔吟序

澤畔吟者逐臣崔公之所作也公代業文宗早茂才秀起家校書蓬山再尉關輔中佐於憲車因貶湘陰從宦二十有八載而官未登於郎署何遇時而不偶耶所謂大名難居碩果不食流離乎沅湘摧頽於草莽同時得罪者數十人或才長命夭覆巢蕩室崔公忠憤義烈形於清辭慟哭

澤畔哀形於翰墨猶風雅之什聞之無罪覩之者作鏡書
所感遇總二十章名之曰澤畔吟懼姦臣之猜常韜之於
竹簡酷吏將至則藏之於名山前後數四蠹傷卷軸觀其
逸氣頓挫英風激揚橫波遺流騰薄萬古至於微而彰婉
而麗悲不自我興成他人豈不云怨者之流乎余覽之愴
然掩卷揮涕爲之序云

餞副大使李藏用移軍廣陵序

夫功未足以蓋世威不可以震主必挾此者持之安歸所
以彭越醢於前韓信誅於後況權位不及於此者虛生危

疑而潛包禍心小拒王命是以謀臣將啖以節鉞誘而烹
之亦由借鴻濤於奔鯨鱣生人於哮虎呼吸江海橫流百
川左縈右拂十有餘郡國討未及誰當其鋒我副使李公
勇冠三軍衆無一旅橫倚天之劔揮駐日之戈吟嘯四顧
熊羆雨集蒙輪扛鼎之士杖干將而星羅上可以決天雲
下可以絕地維翕振虎旅赫張王師退如山立進若電逝
轉戰百勝僵屍盈川水膏於滄溟陸血於原野一掃瓦解
洗清全吳可謂萬里長城橫斷楚塞不然五嶺之北盡餌
於修蛇勢盤地蹙不可圖也而功大用小天高路遐社稷

雖定於劉章封侯未施於李廣使慷慨之士長吁青雲且
移軍廣陵恭揖後命組練照雪樓船乘風簫鼓沸而三山
動旌旗揚而九天轉良牧出祖列將登筵歌酣易水之風
氣振武安之瓦海日夜色雲帆中流席闌賦詩以壯三軍
之士白也筆已老矣序何能爲

奉餞十七翁二十四翁尋桃花源序

昔祖龍滅古道威嚴刑煎熬生人若墜大火三墳五典散
爲寒灰築長城起阿房并諸侯殺豪俊自謂功高義皇國
可萬世思欲凌雲氣求仙人登封泰山風雨暴作雖五松

受職草木有知而萬象乖度禮刑將弛則綺皓不得不遁
於南山魯連不得不蹈於東海則桃源之避世者可謂超
昇先覺夫指鹿之儔連頸而同死非吾黨之謂乎二翁耽
老氏之言繼少卿之作文以述大雅道以通至精卷舒天
地之心脫落神仙之境武陵遺迹可得而窺焉問津利往
水引漁者花藏仙谿春風不知從來落英何許流出石洞
來入晨光盡開有良田名池竹果森列三十六洞別爲一
天耶今扁舟而行笑謝人世阡陌未改古人依然白雲何
時而歸來青山一去而誰往諸公賦桃源以美之

江夏送林公上人遊衡嶽序

江南之仙山黃鶴之爽氣偶得英粹後生俊人林公世爲
豪家此土之秀落髮歸道專精律儀白月在天朗然獨出
旣灑落於彩翰亦諷誦於人口閒雲無心與化偕往欲將
振五樓之金策浮三湘之碧波乘杯泝流考室名嶽瞰憩
冥壑凌臨諸天登祝融之峰巒望長沙之烟火遙謝舊國
誓遺歸蹤百千開士稀有此者余所以歎其峻節揚其清
波龍象先輩迴眸拭視比夫汨泥沙者相去如牛之一毛
昔智者安禪於台山遠公託志於廬嶽高標勝槩斯亦嚮

慕哉紫霞搖心青楓夾岸目斷川上送君此行羣公臨流
賦詩以贈

金陵與諸賢送權十一昭夷序

斯高柄秦嬴世不二三傑伏草與漢並出莽夷朱暉耿鄧
乃起自古英達未必盡用於當年去就之理在大運爾我
君六葉繼聖熙乎元風三清垂拱穆然紫極天人其一哉
所以青雲豪士散在商鈞四座名哲皆清朝旅人吾稀風
廣成蕩漾浮世素受寶訣爲三十六帝之外臣卽四明逸
老賀知章呼余爲謫仙人蓋實錄耳而嘗採姹女於江華

收河車於清溪與天水權昭夷服勤爐火之業久矣之子也冲恬淵靜翰才峻發白每一篇一札皆昭夷之所操吁捨我而南若折羽翼時歲律寒色天風枯聲雲帆涉漢岡若絕電舉目四顧霜天崢嶸銜杯敘離而羣子賦詩以出餞謫仙翁李白辭

江夏送倩公歸漢東序

昔謝安四十年臥白雲於東山桓公累徵爲蒼生而一起常與支公遊賞貴而不移大人君子神冥契合正可乃爾僕與倩公一面不忝古人言歸漢東使我心痲夫漢東之

國聖人所出神農之後季良爲大賢爾來寂寂無一物可
紀有唐中興始生紫陽先生先生六十而隱化若繼迹而
起者惟倩公焉蓄壯志而未就期老成於他日且能傾產
重諾好賢工文卽惠休上人與江鮑往復各一時也僕平
生述作罄其草而授之思親遂行流涕惜別今聖朝已舍
季布當徵賈生開顏洗目一見白日冀相視而笑於新松
之山耶作小詩絕句以寫別意辭曰彼美漢東國川藏明
月輝寧知喪亂後更有一珠歸

送黃鐘之鄱陽謁張使君序

東南之美者有江夏黃公焉白竊飲風流始接談笑亦有
抗節玉立光輝炯然氣高時英辯折天口道可濟物志棲
無垠鄱陽張公朝野榮望愛客接士卽原嘗春陵之亞焉
每欽其辭華懸榻見往而黃公因訪古迹便從貴遊乃僑
裝擬行去國遐陟諸子銜酒惜別沾巾贈分沈醉烟夕惆
悵涼月天南迴以變夏火西飛而獻秋汀葭颯然海草微
落夫子行邁我心若何毋金玉爾音而有遐心湖水演沔
聶哉是行共賦武昌釣臺篇以慰別情耳

欽定全唐文卷三百五十目錄

李白四

兗州任城縣令廳壁記

朱虛侯讚

琴讚

李居士讚

安吉崔少府翰畫讚

當塗李宰君畫讚

宣城吳錄事畫讚

江寧楊利物畫讚

誌公畫讚

金銀泥畫西方淨土變相讚
并序

觀飲飛斬蛟龍圖讚

羽林范將軍圖讚

壁畫蒼鷹讚

方城張少公廳壁畫師猛讚

金鄉薛少府廳畫鶴讚

金陵名僧頽公粉圖慈親讚

地藏菩薩讚 并序

魯郡葉和尚讚

化城寺大鐘銘 并序

天門山銘

天長節度使鄂州刺史韋公德政碑

武昌宰韓君去思頌碑

虞城縣令李公去思頌碑

唐漢東紫陽先生碑銘

溧陽瀨水貞義女碑銘

爲宋中丞祭九江文

爲竇氏小師祭璿和尚文

爲李公先思祭文

先昌率韓家志思祭文

美身酒氣外得然除皮章公祭文

天門山祭文

外祭者大鑿祭文

曹微素味出齋

馮燕苦國齋

欽定全唐文卷三百五十

李白四

兗州任城縣令廳壁記

風姓之後國爲任城蓋秦之古縣也在禹貢則南徐之分
當周成迺東魯之邦自伯禽至於傾公三十四代遭楚蕩
滅因屬楚焉炎漢之後更爲郡縣隋開皇三年廢高平郡
移任城於舊居邑雖屢遷井則不改魯境七百里郡有十
一縣英華云十三縣任城當其要衝東盤瑯琊西控鉅野北走厥
國南馳互鄉青帝太昊之遺墟白衣尚書之舊里也土俗

古遠風流清高賢良閒生掩映天下地博厚川疎明漢則
名王分茅魏則天人列土所以代變豪侈家傳文章君子
以才雄自高小人則鄙樸難治況其城池爽塏邑屋豐潤
香閣倚日凌丹霄而欲飛石橋橫波驚彩虹而不去其雄
麗垞北有如此焉故萬商往來四海絲歷實泉貨之橐籥
爲英髦之咽喉故資大賢以主東道製我美錦不易其人
今鄉二十六戶一萬三千三百七十一

英華云
一十七

帝擇明德

以賀季真宰之公溫恭克修儼碩有立季野備四時之氣
士元非百里之才撥煩彌閒剖劇無滯鏘百發克破於楊

葉刀一鼓必合於桑林寬猛相濟韋弦適中一之歲肅而
教之二之歲惠而安之三之歲富而樂之然後青衿向訓
黃髮禮履耒耜就役農無遊手之夫杼軸和鳴機罕嘖蛾
之女物不知化陶然自春權豪鋤縱暴之心黠吏返淳和
之性行者讓於道路任者併於輕重扶老攜幼尊尊親親
千載百年再復魯道非神明博遠孰能契於此乎白掖奇
東蒙竊聽輿論輒記於壁垂之將來俾後賢之操刀知賀
公之絕迹者也

朱虛侯讚

嬴氏穢德金精摧傷秦鹿克獲漢風飛揚赤龍登天白日
昇光陰虹賊虐諸呂擾攘朱虛來歸會酌高堂雄劔奮擊
太后震惶爰鋤產祿大運乃昌功冠帝室於今不亡

琴讚

嶧陽孤桐石聳天骨根老冰泉葉苦霜月斲爲綠綺徽聲
粲發秋風入松萬古奇絕

李居士讚

至人之心如鏡中影揮斥萬變動不離靜彼質我斤揮風
是騁了物無二皆爲匠郢吾族賢老名喧寫真貌圖粉繪

生爲垢塵從白得衰與天爲鄰儼然不語長存此身

安吉崔少府翰畫讚

齊表巨海吳嗟大風崔爲令族出自太公克生奇才骨秀
神聰炳若秋月騫然雲鴻爰圖伊人奪妙真宰卓立欲語
謂行而在清晨一觀爽氣十倍張之座隅仰止光彩

當塗李宰君畫讚

天垂元精嶽降粹靈應期命世大賢乃生吐奇獻策敷聞
王庭帝用休之揚光泰清濫觴百里涵量八溟縉雲飛聲
當塗政成雅頌一變江山再榮舉邑抃舞式圖丹青眉秀

華蓋目朗明星鶴矯閭風麟騰玉京若揭日月昭然運行
窮神闡化永世作程

宣城吳錄事畫讚

大名之家昭彰日月生此髦士風霜秀骨圖真象賢傳容
寫髮束帶嶽立如朝天闕巖巖兮謂四方之削成澹澹兮
申五湖之澄明武庫肅穆辭峰崢嶸大辯若訥大音希聲
默然不語終爲國楨

江寧楊利物畫讚

太華高嶽三峰倚天洪波經海百代生賢爲夔爲龍廓土

濟川趙城開國玉樹凌烟筆鼓元化形分自然明珠獨轉
秋月孤懸作宰作程摧剛挫堅德合窈冥聲播蘭荃鴻漸
麟閣英圖可傳

誌公畫讚

水中之月了不可取虛空其心寥廓無主錦幪烏爪獨行
絕侶刀齊尺量扇迷陳語丹青聖容去住無所

金銀泥畫西方淨土變相讚

并序

我聞金方之西日沒之所去中華十萬億刹有極樂世界
焉彼國之佛身長六十萬億恆沙由旬眉間白毫向右宛

轉如五須彌山目光清白若四大海水端坐說法湛然常
存沼明金沙岸列珍樹欄楯彌覆羅網周張碑礫瑠璃爲
樓殿之飾頗黎碼碯耀階砌之榮皆諸佛所證無虛言者
金銀泥畫西方淨土變相蓋馮翊郡秦夫人奉爲亡夫湖
川刺史韋公之所建也夫人蘊冰玉之清敷聖善之訓以
伉儷大義希拯拔於幽塗父子恩深用薰修於景福誓捨
珍物購求名工圖金創端繪銀設像八法功德波動青蓮
之池七寶香花光映黃金之地清風所拂如生五音百千
妙樂咸疑動作若已發願及未發願若已當生及未當生

精念七日必生其國功德罔極酌而難名讚曰

向西日沒處遙瞻大悲顏目淨碧海水身光紫金山勤念
必往生是故稱極樂珠網珍寶樹天花散香閣圖畫了在
眼願托彼道場以此功德海冥祐爲舟梁八十一劫罪如
風掃輕霜庶觀無量壽長放玉毫光

觀飲飛斬蛟龍圖讚

飲飛斬長蛟遺圖畫中見登舟旣虎嘯激水方龍戰驚波
動連山拔劔曳雷電鱗摧白刃下血染滄江變感此壯古
人千秋若對面

羽林范將軍圖讚

羽林列衛壁壘南垣四十五星光輝至尊范公拜將遙承
主恩位寵虎臣封傳雁門瞻天蹈舞踊躍精魂逐逐鶚視
昂昂鴻騫心豪祖逖氣爽劉琨名震大國威揚列藩麟閣
之階粉圖華軒胡兵百萬橫行縱吞爪牙帝室功業長存

壁畫蒼鷹讚

突兀枯樹傍無寸枝上有蒼鷹獨立若愁胡之攢眉凝金
天之殺氣凜粉壁之雄姿背銛銛劒戟爪握刀錐羣賓失席
以睟眙未悟丹青之所爲吾嘗恐出戶牖以飛去何意終

年而在斯

方城張少公廳壁畫師猛讚

張公之堂華壁照雪師猛在圖雄姿奮發森竦睂目颯灑
毛骨鋸牙銜霜鈎爪抱月掣蹲胡以震怒謂大厦之嶢峴
永觀厥容神駭不歇

金鄉薛少府廳畫鶴讚

高堂閒軒兮雖聽訟而不擾圖蓬山之奇禽想瀛海之縹
緲紫頂烟施丹眸星皎昂昂貯貽霍若驚矯形留座隅勢
出天表謂長唳於風霄終寂立於露曉凝翫益古俯察逾

烟
妍舞疑傾市聽似聞絃儻感至精以神變或可弄影而浮

金陵名僧顏公粉圖慈親讚

神妙不死惜生此身託體明淑而稱厥親粉爲造化筆寫
天真貌古松雪心空世塵文伯之母可以爲鄰

地藏菩薩讚

并序

大雄掩照日月崩落惟佛智慧大而光生死雪賴假普慈
力能救無邊苦獨出曠劫導開橫流則地藏菩薩爲當仁
矣弟子扶風竇滔少以英氣爽邁結交王侯清風豪俠極

樂生疾乃得惠劔於真宰湛本心於虛空願回聖容以祈
景福庶冥力憑助而厥苦有瘳爰命小才式讚其事讚曰
本心若虛空清淨無一物焚蕩淫怒癡圖寂了見佛五綵
圖聖像悟真非妄傳掃雪萬病盡爽然清涼天讚此功德
海永爲曠代宣

魯郡葉和尚讚

海英嶽靈誕彼開士了身皆空觀月在水如薪傳火朗徹
生死如雲開天廓然萬里寂滅爲樂江海而閒逆旅形內
虛舟世閒邈彼崑閬誰云可攀

化城寺大鐘銘 并序

噫天以震雷鼓羣動佛以鳴鐘警大夢而能發揮沈潛開
覺茫蠢則鐘取象其義博哉夫揚音大千所以清真心
警俗慮協響廣樂所以達元氣彰天聲銘勲皇宮所以旌
豐功昭茂德莫不配美金鼎增輝寶坊仍事作制豈徒然
也粵有唐宣城郡當塗縣化城寺大鐘者量函千鈞聲盈
萬壑蓋邑宰李公之所勗也公名有則系元元之英蕤茂
列聖之天枝生於公族貴而秀出少蘊才略壯而有成西
逾流沙立功絕域帝疇乎厥庸始學古從政歷宰潔白聲

聞於天天書褒榮輝之簡牘稽首三復子孫其傳天寶之
初鳴琴此邦不言而治日計之無近功歲計之有大利物
不知化潛臻小康神明其道越不可尚方入於禪關觀天
宮崢嶸聞鐘聲瑣屑乃謂諸龍象曰曷不建大法鼓樹之
層臺使羣聾六時有所歸仰不亦美乎於是發一言以先
覺舉百里而咸應秋毫不挫人多子來銅崇朝而山積工
不日而雲集今乃採鳧氏撰鳴鐘火天地之鑪扇陰陽之
炭回祿奮怒飛廉震驚金精轉泔以融熠銅液星熒而燿
燿光噴日道氣歆天維紅雲點於太清紫烟矗於遙海烜

赫宇宙功侔鬼神瑩而察之吁可駭也爾其龍質炳發虎
形躩踞縻金索以上絙懸寶樓而迭擊傍振萬壑高聞九
天聲動山以隱隱響奔雷而闐闐救湯鑊於幽途息劔輪
於苦海景福胎蠻被於人天非李公好謀而成宏濟羣物
又孰能與於此乎丞尉等並衣冠之龜龍人物之標準大
雅君子同僚盡心聞善賈勇贊成厥美寺主昇朝閒心古
容英骨秀氣灑落毫素謙柔笑言海受水而皆納鏡無形
而不燭直道妙用乃如是然常虛懷忘情潔已利物是人
行空寂不動見如來有若上座靈隱都維那則舒名僧日

暉蘊虛常因調護賢哉六開士普聞八萬法深入禪惠精
修律儀將博我以文章求我以述作功德大海酌而難名
遂與六曹豪吏姑熟賢老乃緇乃黃鳧趨梵庭請揚宰君
之鴻美白昔忝侍從備於辭臣恭承德音敢闕清風之頌
其辭曰

雄雄鴻鐘砰隱天雷鼓霆擊警大千含號烜赫聲無邊摧
惛魑魅招靈仙傍極六道下九泉劒輪輟苦期息肩湯鑊
猛火停熾然愷悌賢宰人父母興功利物信可久傳芳金
鐘永不朽

天門山銘

梁山博望關局楚濱夾據洪流實爲吳津兩坐錯落如鯨
張鱗惟海有若惟川有神牛渚怪物目圍車輪光射島嶼
氣凌星辰卷沙揚濤溺馬殺人國泰呈瑞時訛返珍開則
九江納錫閉則五嶽飛塵天險之地無德匪親

天長節度使鄂州刺史韋公德政碑 并序

太虛旣張惟天之長所以白帝真人當高秋八月五日降
西方之金精採天長爲名將傳之無窮紀聖誕之節也我
高祖創業太宗成之三后繼統王猷如一大盜閒起開元

中興力倍造化功包天地不然何能遏犧農之頽波返淳
朴於太古雖軒后至道由聞蚩尤之師今網漏吞舟而胡
夷起於轂下先天文武孝感皇帝越在明兩總戎扶風正
帝車於北斗拯橫流於鯨口迴日轡於西山拂蒙塵於帝
顏呼吸而收兩京烜赫而安六合歷列辟而罕匹顧將來
而無儔太陽重輪合耀並出宇宙翕變草木增榮一麾而
靜妖氛成功不處五讓而傳劔璽德冠樂推於戲昔堯及
舜禹皆無聖子審歷數去已終大寶假人飾讓以成千載
之美未若以文明鴻業授之元良與天同休相統億祀則

我唐至公而無私越三聖而殊軌騰萬人之喜氣爛八極
之祥雲上皇思汾陽而高蹈解負重於吾君能事斯畢與
人更始乃展祀郊廟望秩山川方掩骼於河洛弔人於幽
燕但誅元凶不問小罪噫大塊之氣歌炎漢之風雲滂洋
雨汪濊澡渥澤除瑕類削平國步改號乾元至矣哉其雄
圖景命有如此者我邦伯韋公大彭之洪允扶陽之貴族
雄略邁古高文變風運當時賢才堪三事歷職剖劇能聲
旁流衣繡而白筆橫冠分符而彤襜入境曩者永王以犬
人授鉞東巡無名利劔承喉以脅從壯心堅守而不動房

陵之俗安於泰山休奕列郡去若始至帝召岐下涑嘉直
誠移鎮夏口救時艱也慎厥職康乃人減兵歸農除害息
暴大水滅郭洪霖注川人見憂於魚鼈岸不辨於牛馬公
乃抗辭正色言於城隍曰若一日雨不歇吾當伐喬木焚
清祠精心感動其應如響無何中使銜命徧祈名山廣徵
牲牢驟欲致祭公又盱衡而稱曰今皇上明聖懷於百靈
此淫昏之鬼不載祀典若煩國禮是荒巫風其秉心達誠
皆此類也物不知化如登春臺有若江夏縣令薛公揖四
豪之風當百里之寄幹蠱有立含章可貞遵之典禮恤疲

於和樂收其成也臻於小康中京重覩於漢儀列郡還聞
於舜樂選鄂之勝帳於東門乃登豳歌擊土鼓祀蓐收迎
田祖招搖迴而大火乃落閭闔啓而涼風始歸笙竽和籥
之音象星辰而迭奏吳楚巴渝之曲各土風而備陳禮容
有穆簪笏列序羅衣蛾眉立乎玳筵之上班劔虎士森乎
翠幕之前千變百戲分曹賈勇蘭子跳劔迭躍流星之輝
都盧尋橦倒掛浮雲之影百川繞郡落天鏡於江城四山
入牖照山空之海色獻觴醉於晚景舞袖紛於廣庭鶴髮
之叟雁序而進曰恭聞天子無戲言恐轉公以大用老父

不畏死願留公以上聞悅坐棠而餐風庶刻石以寘美白
觀樂入楚聞韶在齊採諸行謠遂作頌曰

爽朗太白雄光下射崢嶸金天華嶽旁連降精騰氣赫矣
昭然誕聖五日垂休萬年孽胡挺災大人有作雷電發揚
橈槍乃落九服交泰五雲縈薄掃雪屯蒙洗清寥廓軒后
訪道來登峨眉上皇西去異代同時六龍轉駕兩曜迴規
重遭唐主更覩漢儀肅肅韋公大邦之翰秀骨嶽立英謀
電斷宣風樹聲遠威逆亂不長不極樂奏爭觀丸劍揮霍
魚龍屈盤東迴舞袖西笑長安頌聲載路豐碑是刊

武昌宰韓君去思頌碑

仲尼大聖人也宰中都而四方取則子賤大賢也宰單父
人到於今而思之乃知德之休明不在位之高下其或繼
之者得非韓君乎君名仲卿南陽人也昔延陵知晉國之
政必分於韓獻子雖不能遏屠岸之誅存孤嗣趙太史公
稱天下陰德也其賢才羅生列侯十世不亦宜哉七代祖
茂後魏尚書令安定王五代祖鈞金部尚書曾祖駿銀青
光祿大夫雅州刺史祖泰曹州司馬考睿素朝散大夫桂
州都督府長史分茅納言剖符佐郡奕葉明德休有烈光

君乃長史之元子也妣有吳錢氏女及長史卽世夫人早
孀宏聖善之規成名四子文伯孟軻二母之儔歟少卿當
塗縣丞感旣重諾死節於義雲卿文章冠世拜監察御史
朝廷呼爲子房紳卿尉高郵才名振耀幼負美譽君自潞
州銅鞮尉調補武昌令未下車人懼之旣下車人悅之惠
如春風三月大化姦吏束手豪宗側目時有纈玉者三江
之巨橫白額且去清琴高張兼操刀永興二邑同化時鑿
齒磨牙而兩京城守易子而炊骨吳楚轉輸蒼生熬然而
此邦宴如襁負雲集居未二載戶口三倍其初銅鐵曾青

不擇地而出大冶鼓鑄如天降神旣烹且爍數盈萬億公
私其賴之官絕請託之求吏無絲毫之犯本道採訪大使
皇甫公旣聞而賢之擢佐輜軒多所宏益尚書右丞崔公
禹稱之於朝相國崔公渙特奏授鄱陽令兼攝數縣所爲
投刀而皆虛爲政則理成去若始至人多懷恩新宰王公
名庭璘巖然太華浼然洪河含章可貞幹蠱有立接武比
德弦歌連聲服美前政聞諸耆老與邑中賢者胡思泰一
十五人及諸寮吏式歌且舞願揚韓公之遺美白採謠刻
石而作頌曰

峨峨楚山浩浩漢水黃金之車大吳天子武昌鼎據實爲
帝里時難世訛薄俗如燬韓君作宰撫茲遺人滂注王澤
猶鴻得春和風潛暢惠化如神刻石萬古永思清塵

虞城縣令李公去思頌碑

并序

王者立國君人聚散六合咸土以百里雷其威聲革其俗
而風之漁其人而涵之其猶衆鮮洋洋樂化在水波而動
之則憂頽尾之刺作焉徐而清之則安頌首之頌興焉苟
非大賢孰可育物而能光昭絃歌卓立振古則有虞城宰
李公焉公名錫字元勳隴西成紀人也高祖楷隋上大將

軍繇益原三州刺史封汝陽公會祖騰雲皇朝廣茂二州
都督廣武伯祖立節起家韓王府記室參軍襲廣武伯父
浦郢海淄唐陳五州刺史魯郡都督廣平太守襲廣武伯
皆納忠王庭名鏤鐘鼎侯伯繼迹故可略而言焉公卽廣
武伯之元子也年十九拜北海壽光尉心不挂細務口不
言人非羣吏罕測望風敬憚秩滿轉右武衛倉曹參軍次
任趙郡昭慶縣令奉詔修建初啓運二陵總徒五郡支用
三萬貫舉築雷野不鞭一人功成餘八千貫其幹能之聲
大振乎齊趙矣時名卿巡按陵有黃赤氣上衝太微散爲

慶雲數十處蓋精誠動天地也如此因粉圖奏名編入國
史天寶四載拜虞城令而天章寵榮俾金玉王度炯若七
耀召回堂隅於戲敬之哉宸威臨顧作訓以理其俗魯而
木舒而徐急則狼戾緩則鳥散公酌以鈞道和之琴心於
是安四人敷五教處必礪食行惟單車觀其約而吏儉仰
其敬而俗讓激直士之素節揚廉夫之清波三月政成鄰
境取則因行春見枯骸於路隄惻然疚懷出俸而葬由是
百里掩骼四封歸仁有居喪行號城市者習以成俗公勗
之親鄰厄以凶事而鰥寡憚獨衆所賴焉可謂變其頽風

永錫爾類先時邑中有聚黨橫猾者實惟二耿之族幾百家焉公訓爲純人易其里曰大忠正之里北境黎邱之古鬼焉或醉父以刃其子自公到職蔑聞爲災官宅舊井水清而味苦公下車嘗之莞爾而笑曰旣苦且清足以符吾志也遂汲用不改變爲甘泉蠡邱館東有三柳焉公往來憩之飲水則去行路勿翦比於甘棠鄉人因樹而書頌四十有六篇惟公志氣塞乎天地德音發乎聲容縞乎若寒崖之霜湛乎若清川之月彈惡雪善速若箭飛尤能筆工新文口吐雅論天下美士多從之遊非汝陽三公二伯之

積德則何以生此邑之賢老劉楚瓌等乃相謂曰我李公
以神明之化大賴於虞人虞人陶然詠歌其德官則敬去
則思山川鬼神猶懷之況於人乎乃咨羣寮興去思之頌
縣丞王彥暹員外丞魏陟主簿李詵縣尉李向趙濟盧榮
等同德比義好謀而成相與採其瓌蹤茂行俾刻石篆美
庶清風令名奮乎百世之上其詞曰
激揚之水兮白石有鑿李公之來兮雪虞人之惡厥德孔
昭折獄旣清五教大行殷雲雷之聲旣父其父又子其子
春之以風化成草靡乃影我岡乃雨我田陽無驕愆四載

有年人戴公之賢猶百里之天棄余往矣茫如墜川哀喪
惠博掩骼仁淡苦井變甘凶人易心三柳勿翦永思清音

唐漢東紫陽先生碑銘

嗚呼紫陽竟天其志以默化不昭然白日而昇九天乎或

將潛賓皇王非世所測

闕十
一字

挺列仙明拔之英姿明堂平

白長耳廣顙揮手振骨百關有聲殊毛秀采居然逸異

闕
十

而且達河龜鶴早世而蟪蛄延秋元命乎遭命乎余長

息三日懵於變化之理先生姓胡氏

闕六
字

族也代業黃老

門清儒素皆龍脫世網鴻冥高雲但貴天爵何徵閥閱始

八歲經仙城山

關十
一字

有清都紫微之遐想九歲出家十二

休糧二十遊衡山雲尋洞府水涉溟壑神王

關八
字

召為威

儀及天下採經使因遇諸真人授赤丹陽精石景水母故

常吸飛根吞日魂密而修之

關六
字

所居苦竹院置餐霞之

樓手植雙桂棲遲其下聞金陵之墟道始盛於三茅波乎

四許華陽

關七
字

陶隱居傳昇元子昇元子傳體元體元傳

貞一先生貞一先生傳天師李含光李含光合契乎紫陽

關五
字

於神農之里南抵朱陵北越白水稟訓門下者三千

餘人鄰境牧守移風問道忽遇先生之宴坐

關五
字

隱機雁

行而前爲時見重多此類也天寶初威儀元丹邱道門龍

鳳厚禮致屈傳籙於嵩山東京大唐

闕二字

宮三請固辭偃

臥未幾而詔書下責不得已而行入宮一革軌儀大變都

邑然海鳥愁臧文之享狻狙裂周公之衣志往迹留稱疾

辭帝尅期離闕臨別自祭其文曰神將馱余余非馱世迺

顧命姪道士胡齊物具平肩輿歸骨舊土王公卿士送及

龍門入葉縣次王喬之祠目若有覩泊然而化天香引道

尸輕空衣及本郡太守裴公以幡華郊迎舉郭雷動南

闕三字

字開顏如生觀者日萬羣議駭俗至其年十月二十二日

葬於郭東之新松山春秋六十有二先生含宏光大不修
小節書不盡妙鬱有崩雲之勢文非夙工時動雕龍之作
存也宇宙而無光歿也浪化而蟬蛻豈闕八乎有鄉僧貞
倩雅仗才氣請余爲銘余與紫陽神交飽餐素論十得其
九弟子元丹邱王闕等咸儗鸞鳳之儀羽想珠玉之雲氣
灑掃松月載揚仙風篆石頌德與茲山不朽其詞曰

賢哉仙士六十而化光光紫陽善與時而爲龍蛇固亦以
生死爲晝夜有力者挈之而趨劫運頽落終歸於無惟元
神不滅湛然清都延陵旣歿仲尼嗚呼青青松柏離離山

隅篆石頌德名揚八區

溧陽瀨水貞義女碑銘

皇唐葉有六聖再造八極鏡照萬方幽明咸熙天秩有禮
自太古及今君君臣臣烈士貞女采其史傳名節尤彰可
激清頽俗者皆掃地而祠之蘭蒸椒漿歲祀罔缺而茲邑
貞義女光靈翳然埋冥古遠琬玉不刻豈前修博達者爲
邦之意乎貞義女者溧陽黃山里史氏之女也以家溧陽
史闕書之歲三十弗移其志清英潔白事母純孝手柔荑
而不龜身激漂以自業當楚平王時王虐忠助讒苛虐厥

政芟於尚斬於奢血流於朝赤族伍氏怨毒於人何其深
哉子胥始東奔勾吳月涉星遁或七日不火傷弓於飛逼
迫於昭關匍匐於瀨渚舍車而徒告窮此女目色以臆授
之壺漿全人自沈形與口滅卓絕千古聲凌浮雲激節必
報之讐雪誠無疑之地難乎哉借如曹娥潛波理貫於寧
道聶姊殞肆槩動於天倫魯姑棄子以却三軍之衆漂母
進飯沒受千金之恩方之於此彼或易爾卒使伍君開張
闔閭傾蕩鄢郢吳師鞭屍於楚國申胥泣血於秦庭我亡
爾存亦各壯志張英風於古今雪大憤於天地微此女之

力雖員爲忠孝之士焉能咆哮烜赫施於後世耶望其溺
所愴然低徊而不能去每風號吳天月苦荆水響像如在
精魂可悲惜其投金有泉而刻石無主哀哉邑宰滎陽鄭
公名晏家康成之學世子產之才琴清心閒百里大化有
若主簿扶風竇嘉賓縣尉廣平宋陟丹陽李濟南郡陳然
清河張昭皆有卿才霸略同事相協緬紀英淑勒銘道周
雖陵頽海竭文或不死其辭曰

粲粲貞女孤生寒門上無所天下報母恩春風三十花落
無言乃如之人激漂清源碧流素手縈彼潺湲求思不可

秉節而存伍胥東奔乞食於此女分壺漿滅口而死聲動
列國義形壯士入郢鞭屍還吳雪恥投金瀨汜報德稱美
明明千秋如月在水

爲宋中丞祭九江文

謹以三牲之奠敬祭於長源公之靈惟神包括乾坤平準
天地劃三峽以中斷疏九道以爭奔綱紀南維朝宗東海
牲玉有禮祀典無虧今萬乘蒙塵五陵塹黷蒼生悉爲白
骨赤血流於紫宮宇宙倒懸橈槍未滅含識結憤思翦元
凶而況參列雄藩各當重寄遵奉王命大舉天兵照海色

於旌旗肅軍威於原野而洪濤渤涌狂飈振驚惟神使陽
侯卷波羲和奉命樓船先濟士馬無虞掃妖孽於幽燕斬
鯨鯢於河洛惟神祐我降休於民敬陳精誠庶垂歆饗

爲竇氏小師祭璿和尚文

年月日某謹以齋蔬之奠敢昭告於和尚之靈伏惟和尚
降靈自天依化遊世角立獨出嶷然生知鳳凰開九苞之
翼豫章橫萬頃之陂始傳燈而納照因落髮以從師邁龍
象以蹴踏爲天人之羽儀紹釋風於西域迴佛日於東維
若大塊之噫氣鼓和風而一吹熱惱清灑道芽榮滋走吳

楚以宗仰將掃地而歸之嗚呼來
所從去復何適水還
火歸蕭散本宅寶舟輟棹禪月掩魄痛一往而無踪愴雙
林之變白某早乘訓誨偏倚恩慈忝餐風於法侶旋落蔭
於禪枝號無輟響泣有餘悲手撰茗藥精誠嚴思冀神道
之昭格庶明靈而饗之

欽定全唐文卷三百五十一目錄

康子元

南郊先燔後祭議

對習卜算判

對參軍鵲子判

對歸胙判

對小吏歡言判

對文章判

員俶

對家僮視天判

鄭績

對無鬼論判

袁映

神岳舉賢良方正策

張日新

大邑縣鶴鳴山神碑

賈彥璿

大唐故忠武將軍行_並王_府典軍上柱國平棘縣

開國男李府君墓誌銘

熊曜

琅琊臺觀日賦

并序

徐太亨

丈人祠廟碑

郭納

對拜命布武判

右武衛將軍柳公神道碑

次為瀛洲草麻公軒齋

樓扶合飲在伴

寒齋

夫人歸鳳軒

余本亭

軒雅臺感日頹
長風

翰

關國吳李氏故集齋論

欽定全唐文卷三百五十一

康子元

子元越州會稽人開元中舉能治易老莊者擢侍讀遷祕

書少監兼集賢侍講學士徙宗正少卿以疾授祕書監卒

贈汴州刺史

南郊先燔後祭議

議曰臣等謹按顯慶年修禮官長孫無忌等奏改燔柴在

祭前狀稱祭祀之禮必先降神周人尚臭祭天則燔柴者

臣等按禮迎神之義樂六變而天神降八變而地祇出九

變則鬼神可得而禮矣則降神以樂周禮正文非謂燔柴

以降神也按尚臭之義不為燔之先後假如周人尚臭祭

天則燔柴容或燔臭先以迎神然則殷人尚聲祭天亦燔

柴何聲可燔先迎神乎又按顯慶中無忌等奏稱晉氏之

前猶遵古禮周魏以降妄為損益者今按郭璞晉南郊賦

及注爾雅祭後方燔又按宋志所論亦祭後方燔又檢南

齊北齊及梁郊祀亦先飲福酒訖燔燎

一作後方燔

又按後周

及隋郊祀亦先祭後燔據此即周遵後燔晉不先燔無忌

之奏事乃相乖又按周禮大宗伯職以玉作六器以禮天

地四方注云禮為始告神時薦於神坐也又云以蒼璧禮
天以黃琮禮地皆有牲幣各放其器之色又禮器云有以
少為貴者祭天特牲是知蒼璧之與蒼牲俱合奠之神坐
理即一作節不惑又云四珪有邸以祀天旅上帝即明祀昊

天上帝之時以旅五方天帝明矣其青珪赤璋白琥元璜
自是立春立夏立秋立冬之日各於其方迎氣所用自分
別矣今按顯慶所改新禮以蒼璧與蒼牲蒼幣俱用先燔
蒼璧既已燔矣所以遂加四珪有邸奠之神坐牲既已燔
矣所以更加駢牲充其寶一作實俎混昊天於五帝同用四

珪失特性之明文加為二犢深乖禮制事乃無憑請依貞
觀舊禮先祭後燔庶允經義謹議

對習卜算判

自長立春趙丁年十八弟乙年十六並解卜算所司補丁

為卜筮生補乙為歷生訴稱歷生六年滿兄年

長易就卜筮生八年方滿弟年幼請更習業所

司不許苦訴不伏

趙達餘苗惟丁及乙並測玉衡之度俱閑瓦兆之占二十

未能成童已邁謀龜謀筮補丁以卜史之曹六日六旬任

乙於保章之署雖咸用其術而未愜所懷論長幼於弟兄
徒稱易就訴六八之年載頗亦難從假有讓詞庸無他計
既言並解方見同收所司差擇寧乖允當各參爾位無或
浮言道謝良子少謝野又本代文補與心帝末封封官
之無對參軍鶻子判之膜孟聚於鳳軒親於姑里
金州或州西州人遂鶻子先任沙州參軍永淳二年赴選
千隄之封冬集歸至甘州病經二年今於沙州取選解不
於京臺銓試直赴神都選曹司判不許稱鄉路
阻遠既有田收合便赴選

域中有道天下無外雖在戎落亦挂周行鶻子運偶南薰
地濱西域久沐唐虞之化獲參州郡之班萬里牽絲俄畢
子荆之任九流懸鏡行披彥輔之雲未果登龍旋驚退鷁
金微絕徼將還敬梓之鄉玉塞遙途尚轉飄蓬之陌風霜
之疾忽遘於虵杯寒暑之期亟環於鳳律瞻彼故里歸路
仍懸載撫身名鈿衡復及本州文解難以希求往往官曹
易爲憑託遂蒙申送但事奔波不就京邑仙臺直指神都
覽觀辭官歷稔不可妄託田收明勅垂文無宜越來此選
二途咸爽百慮空馳請責詭隨之人無黷清通之鑒

對歸胙判

甲監享以胙歸父餽而祭

無文咸秩既重於肅雍有功則祭或防於跛倚甲以棘七
方載式預監牲茅縮以陳遂聞歸胙餽食煙達應非尊者
之餘胙致日嚴自入先生之饌用此而祭頗乖經禮之儀
未及於刑須黜平典之議

對小吏歡言判

景與小吏歡言倨見功曹將黜不伏

義在斯合借容猶重於將軍道或可存縫掖未輕於太守

景歡言小吏將疑十五之詩倨見功曹無近三千之律耕
耘禮義儒行已申於仲尼嘯傲風雲高節未屈於光逸雖
闕循牆之敬豈干銘鼎之科將加譴黜恐乖寬裕希從理
遣無重斯愆

對文章判人夫主之黜用此而祭賦乖黜對之辭

鄭景才學高邁郡牧使求其文章景扶醉揮毫
書於几上令使者寫之而去法司以為失禮欲
科傲慢罪縣令以文同宿構堪為薦舉

鄭景學邁八千自高天爵郡牧賢求五百式賁人文而礫

魄無拘忽醉廚中之酒崩騰有作便題几上之文使者操
觚寫而旋去法司執憲訊以剛來雖疾惡之誠初疑可爾
而優賢之道良或未然邑宰政尚儒風事符茅茹以爲詞
同宿構無慙孫綽之金德應敷敷堪薦郗詵之玉眷茲兩
議須遵一理昔嗣宗醕酤曾不寘以科條今鄭景含毫何
遽繩於傲慢請輟埋桐之事微申樹李之風

員傲

彭志甲云專心勸業不於

員傲

傲半千孫開元十六年以能言佛道孔子者召入禁中相
答難屈其坐人

對家僮視天判

甲於庭中作小樓令家僮更直於上視天乙告

違法甲云專心候業不伏

聖人體道雖旁行而不流君子為儒亦博覽而多識甲誠不敏嘗窺祕文傳妙術於青猿得精符於翠鳳管公明之好事不寐每踰於夜分劉子政之多能觀星或至於明發固當率由古道仰止先賢既非日御之官當晦風占之跡況門庭之內賓友相趨遂乃別構青樓迴披丹檻當幄異紅粧之女寓宿乃蒼頭之僕董舒災異主父猶且致尤雕

語怪神秦帝尚令下獄既私庭竊候罪已良多公憲正詞
刑其無捨但以考陳生之國志嘗有其人徵葛公之蜀科
未聞斯罪古今異政夫何足疑待更細推方從公議

鄭績

績元宗時人

對無鬼論判

甲執無鬼論俄而鬼忽來取求乞免鬼云誰似
汝者甲云乙似而便死後乙弟知告甲謀殺兄
不伏

神理茫昧幽明舛蠱揆之於有演象渙於周經覈之於無
持論標於晉史甲也持離堅之辨乙也邁无妄之災人謀
鬼謀殊與能之迹一生一死等交情之見雖在原有急難
之忿而徙壑無可返之魂不降錫齡之神忽怨淫昏之鬼
且當其變起倉卒事兼天枉苟寧我之是圖豈恤人之有
責况泛詳昭典靡及幽途讓以偷生方期恥格抑之謀殺
稍涉淫刑菲見所窺事宜從記

袁映

映元宗時人

神岳舉賢良方正策

原闕問

對臣聞天矜於人人必所從臣謬黷吹萬僻生草莽幸陶
無爲之風得守忠蹇之迹常願拜手宸極敷獻乃誠危言
匪躬少答亭育昔仲尼稱鳳鳥不至河不出圖蓋傷衰周
之運不見聖明之代也臣今輿頌芻言肅祗眷命陪聖蹕
於神岳奉金策於玉宸賡歌泰清咫尺旒宸是天縱聰明
而超於孔某不圖幸之至於斯也況周頒禹膳列坐堯衢
此優賢之至也愚臣何足以充塞敢不布其腹心竭盡聞
見臣伏惟皇穹有成命聖唐受之崇高配天廣大配地天

地合德而陛下大明於其中有以覲高祖之耿光有以恢
太宗之鴻烈樂成於郊祀而昭升上帝禮備於臚上而敷
聞后祇於是柴于岱宗望于秩首三光全而五行序八荒
協而萬國諧皇靈丕應象物昭格無疆惟休能事畢矣況
陰陽變理則賢相盡規風俗敦龐則良牧宣政百揆時序
庶物咸亨誠已鬱映華胥邁績堯舜豈夷吾所記七十二
之涼德而望清光哉而猶恭默思道勵精圖政帝闕崢嶸
而下臨天問昭回而盡覩乃賜臣策曰延想無爲之理聿
修太和之化匪曰能致將與圖之所以謀廣聰明詢於大

陋使君子道長俊乂用彰陛下執謙之至也天下幸甚入
下幸甚愚臣無得而稱焉制策曰夫原疾而授藥者良醫
也因時而救弊者權政也今塞垣猶守府兵云耗閒人輕
去冗食難歸者臣聞先王之理布在方策乘時司契其道
深乎陛下窺覽萬化之源獨運安危之兆執大象鼓洪鑪
知微其神惟睿作聖九門嘗藥致蒼生於福壽七政齊衡
得元珠於利見雖講信修睦寰區大同而安不忘危故塞
垣仍守雖道德齊禮黔庶康濟而寬以厚載故閒人或浮
臣又聞之兵戈者威不軌而昭文德也兆庶者忘帝功而

畏苛政也邊鄙豫備誰能去軍參決違方時聞失業總寰
瀛而觀偃伯則三邊之戍役不足多也據天下而覽兆人
則萬一之逋逃不足怪也況國家皇極作乂七政有倫增
新軍以保釐革浮惰而綏輯何憂乎府兵之耗何有乎冗
食不歸雖休勿休惟陛下之聖慮也制策曰膏粱無恥於
僥倖蓬蓽未致於退讓選舉殷湊官員不給效職者或祿
仕而養資試言者多浮華而背實當今士食舊德農服先
疇結綬登朝咸遵揖讓被褐在野盡歸廉潔臣實覩還淳
反素之風不知無恥未敦之事尊謙俯問臣何敢奉欽若

帝唐之有天下也久於其德人文化成敦詩書悅禮樂濟
濟多士開元以寧日者十銓分鏡羣材焯敘觀行考言責
名徵實克黜浮薄登延俊秀大革前弊其命維新則推讓
之風行尸素之源滅其肯養資祿仕以速官謗若使會府
持衡守而勿失將恐詠彼空谷歎此才難豈有員不給官
殷煩乎選士言而背實浮華於舉才臣雖庸愚有以知其
不然也制策曰豈風之不臧何草之難偃也澄源正本厥
路何由聞乎古者井田有助公私取給諸侯貢士賞罰存
焉改轍欲從迷津尚佇者臣聞人無恆德實從上教草順

風而靡偃水隨器而方圓陛下神謀元行德如天覆驅今
之代歸於壽域深源固本政事惟醇俗旣分於土宜人亦
同於上好又何取乎井田古制力助前規賞罰於歲貢之
士增削於諸侯之地若斯而已哉夫五帝不沿樂三皇不
襲禮非固相反蓋取隨時泥以從鈞車難改轍臣誠愚妄
不識大體竊願陛下神而化之使人宜之正如當今之代
也策曰文質再復忠敬何適於時齊魯一變親賢何近於
道也大哉聖問臣敢颺之臣聞之文質再而復正朔三而
改殷因於夏周因於殷人德齊莊夏尚忠厚殷人質也周

人文也文質雖變忠敬咸宜不敬則禮節遂乖不忠則弼
諧斯替匡朝闡化適時惟一然則敬自外飾忠由內淳必
也奚先請同去食若乃親親而尊尊者其有周公之餘化
乎舉賢而尚忠者其有太公之遺風乎孔子曰齊一變至
於魯魯一變至於道魯由舊章斯焉殆庶制策曰擇何典
而淳俗乘何法而安人何功而天地和平何德而黎元富
壽者臣聞諸元元皇帝曰我無欲而人朴大哉至道不可
多言伏願陛下克修聖祖恢維化綱崇帝象之風反皇人
之始俗已淳矣人斯安矣三事允理六府孔修則地平天

成矣輕徭薄賦慎罰措刑則既富且壽矣豈臣庸鯁克堪
預焉伏以垂政立範因時變通布陳前載簡在帝聰今乃
下問愚鄙徵其辨述豈不欲觀其末學收其微才臣狂妄
斐然非相如子雲之流也幸屬千齡大慶五載修封遂得
獻頌皇衢參陪鑾扈慙考言之無取念天獎而何階忠比
魏臣空思捧日夢非秦后謬至鈞天跼影天庭若臨冰谷
謹對

日新元宗時人

大邑縣鶴鳴山神碑

鶴鳴山據九老仙經云黃帝時有天真皇人駕鶴來此山上棲息數日有鶴悲鳴化而為石因號鶴鳴山又言隋開皇三年蜀主秀夢一神人紫衣金冠侍從千人居此山下令使者訪焉古老曰先有此神在此山前闕水之側漢和帝封為鶴鳴山君即此神也

賈彥璿

元宗時人

大唐故忠武將軍行薛王府典軍上柱國平棘縣

開國男李府君墓誌銘

君諱無慮字忠眷隴西人也昔月貫於昴咎繇誕而邁德
 氣感流星伯陽生而啟聖惟彼降瑞因茲命氏曾祖貴隋
 太中大夫延州刺史涼國公皇朝封隴西公任切分憂寵
 加芳理朱旗映日阜蓋生風屬隋室道喪我唐天啟疇庸
 錫壤俾崇舊勳封以隴西昭其業也祖斌皇朝銀青光祿
 大夫隰吉二州刺史襲封隴西公闕高闕御下以寬洗憤
 清心不言而理襲封本郡昭其祚也父闕道皇金紫光祿
 大夫汾州刺史股肱之郡公輔之材克著政闕尤闕人望

遷鎮軍大將軍左驍衛大將軍上柱國襲封隴西郡公武

庫森森縱橫矛戟智囊闕風雲煥乎鉤陳設在蘭錡乃祖

乃父自公自侯昭其貴也君衣冠奕世禮樂闕賢慶靄炳

靈光昭茂大君有命人衛天和階闕呈祥仲由負三軍之

勇燕頷標異班超封萬里之侯弱冠於清邊軍立功授游

擊將軍左衛長上明畧經濟雄心英果剋清妖孽飲至天

庭師出以臧功宜上賞朱紱斯曜可不偉歟無何轉授鄜

州章州府右果毅時關內按察使強闕以君幹蠱奏攝會

州司馬又改授同州洪泉府左果毅仍令長上一貴一賤

喜愠不形於色或出或處寵辱無介於懷位闕題輿闕申

龐統名參都尉闕屈曾洪有勅差充闕野軍副使舉不失

德勤不告勞展充國之務農輟揚雄之執戟軍儲是給闕

馬賴焉尋為太原節度使李暉奏授薛王府典軍蔽雄

城趨侍闕每入招賢之觀時陪樂闕之遊習習雄風和而

扇物粲粲闕寵而益闕青春始華元夜祕景歲不我與天

奪其運以開元十七年五月七日終於靜恭私第春秋六

十有二以其年六月十一日歸葬於萬年縣神禾舊原陪

光塋禮也嗚呼哀哉賢王端憂故人啜泣垂天之翼必鍛

於紫霄經國之材俄辭於白日遂使瑤林瓊樹瘞草木於
佳城龍章鳳姿沒風煙於闕嗣子闕庭等孝履增感攀號
無訴恭陳遺事俾刊豐石銘曰

公侯之子兮累代其昌河岳之秀兮為龍為光克岐克嶷
兮發言有章立功立事兮厥政其芳天何為兮速罹其殃
哲人痿兮為代所傷飛旒翩翩兮出帝鄉素車逶遲兮西
龍岡闕以大隧墜於便房勒勲鐘鼎畫像旗常日黯黯兮
愁欲暮風蕭蕭兮悲白楊

熊曜

熊曜

金匱全書卷三百五十一
曜南昌人開元中進士為貝州參軍

琅琊臺觀日賦并序

秦築東門於海岸曰琅琊臺高可望遠而東之人悉以宵
分之後觀日於海底者壯其觀而為賦云
秦門之東天地一空直見曉日生於海中赤光浮浪如沸
如鑠驚濤連山前拒後却圍規上下隱見寥廓焜煌天垂
若吞巨壑當其扶桑洶湧於雲光陽德出麗於乾剛汗漫
翁納將吞六合沖融青冥遙浸大波羲和首馭夸父上征
眩轉心目蒼黃性情傾地輿而通水府吸天蓋而駭長駢

彼秦伊何崇此爲門委絕人力其誰敢論失萬邦者雖設
門而必圮表東海者諒無門而亦存步秦亭而在此傷魏
闕而何言千載之後石梁斯在時無鬼功豈越滄海念無
道而肆志將不亡而何待我國家踰溟渤而布聲教窮地
理而立郊垆畧秦皇於帝典參漢武於天經顧荒臺而寂
寞取殷鑒於生靈爾其秋景超忽晴光渙發蜃氛干雲蚌
胎候月長波沃蕩超百谷以深沈唳鶴徘徊想三山而滅
沒齊魯郡邑霜天次寥凌虛無而倒景臨沆瀣而乘朝日
向濛汜雲橫麗譙追魯連之達節行將蹈海仰田橫之行

義若在雲霄驪龍之珠羣玉之府想望縣邈依稀處所有
海客之無心託扶搖之輕舉無而風景調元登而乘降

徐太亨

太亨元宗時人靈爾其林景跋然觀其與好登于雲

丈人祠廟碑

帝典參黃左林天監願萊臺

夫丈人山者本青城山周回二千七百里高五千一百丈

即道家第五寶仙九室之天矣黃帝拜為五嶽丈人因以

為稱服朱光之袍戴蓋天之冠佩三庭之印乘科車主五

嶽上司六時降水仙唱泠泠而霄轉神燈爛爛而夕照仙

都眾妙之奧福地會昌之域張天師羽化之處焉其爲狀
重山疊嶂巨壑幽溪藏金而碕岸穹崇蘊玉而林篁潤澤
紅巖爭出絳岑攢秀上巍峩而勢斷於空下崦岬而不見
於底紫氛曉靄黛色晴濃欹崑嶷谷而中豁穹石隱嶙而
回跨削成超華峻極逾嵩錦峯懸烏兔之輝赤水截虹蜺
之影剗有靈芝擢秀芳桂叢生龍篠嬋娟而駢峙塵松森
梢而重列水因祈而愈疾山至感而登仙龜鶴於是乎栖
游鸞鳳於是乎翔集露光懸白卽盈隱士之杯霞氣飛紅
遂映仙家之酒至夫恍惚幽象窅冥醜迹怪異休徵鬼神

情狀則宣尼所不談矣我開元神武皇帝執持大象恢宏
祕籙天宇廓清人寰交泰蚩尤害盡訪道於崆峒華封喜
來尋真於姑射郊禋天地大禮也望秩山川巡狩也封勒
岱宗報成也巡謁五陵至孝也講習二言崇道也飾禮神
之館增類帝之壇禋於六宗徧於五嶽尊明號擁神休河
洛獻圖書山川出車馬將以下咸五上登三與日月以齊
明並乾坤而合德南山獻壽巍巍而永固西母進圖明明
而本列則夏殷周漢將何以儔議哉奉開元十八年閏六
月十八日勅於青城丈人山置祠室又奉今年八月二十

一日勅青城丈人山宜令所管州縣揀本山幽靜處與立
祠廟其圖分付道士將往建立銀青光祿大夫使持節蜀
州諸軍事蜀州刺史上柱國昌平縣開國侯臣楊勵本忠
孝是資公清在職惠以綏物刑以平邪三刃之州縣克寧
五符之功勲獨効奉遵宸旨恭惟靈廟親畫規模改興版
築亟勤冰節採構雲林計日而成工徒不擾至若輪奐光
華崇蔚晶麗倚碧巖而遐構面洺潭而宏峙拱櫨杳出芬
檉疊施虹梁數重虬簷四起丹楹霞葩紫壁冰淨豐雄而
曉挂斷雲皎晶而夜懸明月棟宇成矣彰聖主之崇恩堂

室歸然想神靈之是愛足可殷薦芳果尊奠馨稷又奉八月二十五日勅青城丈人廟准五嶽真君廟例抽德行道士五人焚香供養聖恩覃溢天澤洪沛神姿麗美遠降於九天麗像昭輝長存於三蜀固當保持薦祉扶護聖躬鳳歷千秋龍居萬歲豈蓬萊方丈久視長生哉縣令薛倚錦製臨人絃鳴作宰惠存憚獨威息奸豪道揚三教政兼五縣僉爲揚洪徽騰茂烈大功必歆於刊勒大仙必期於福應微臣弱翰職慰斯勞黃卷雖勤元經已老庶夫紀功銘石地久天長山嶽之靈迹載揚江漢之豐碑獨立其詞曰

聖人大造澤及山川秩宗望祭通幽洞元惟此靈嶽代出
神仙丹邱紫府逗月乘煙虔奉宸渙創營靈室峻宇千星
回軒抱日虹梁載構虬簷突出燦爛孤雄巍峩罕匹天降
神像飾以丹青真空睽睽仙壁瑩瑩蘋蘩入奠黍稷陳馨
光深岷曲色照江汀英英仙使奉宣明旨勤勤良牧至公
而理式建華堂長開靈祀福庭幽寂齋壇迴起神功可紀
聖德長存勒此銘石傳諸後昆景福肸鬻神報國恩宗枝
百代子子孫孫徐太亨記

郭納

金定全唐文 卷三十一
納開元朝陳留採訪使

對拜命布武判

王季拜命堂下布武王人謂失肅恭正以簡書

季云其儀得中

國有燕饗使存聘覲苟趨步失容豈外臣倨禮王季秩班
王爵位參朝會拜命之辱則崇布武之儀肅恭之容旋被
簡書之正故知取禮則非爽謂失則深文肆無稽之薄言
責有恒之大典眷言彼季頗習禮經得中之儀固無乖於
揖讓同惡之恤爰匪臧於訟詞誰謂王人不如林放

右武衛將軍柳公神道碑

公諱嘉泰字元亨其先魯展氏自司空無駭至於展禽食

邑柳下遂因采錫姓魯爲楚滅遷於晉之解縣今爲河東

解人也洎衛之莊漢之社稷之講論六義琮之黃金一筭

赫奕勲業代有其人夫乾之垂象也上將躔於五緯坤之

導河也中條控於一曲

闕一字

以毓粹應德岳以降神生賢

賢可以爲王爪牙德可以爲國禦侮孰任其所事則公庶

幾焉曾祖則隋左衛騎曹參軍皇贈蒲州長史堙元卑位

有才無時季葉蕩而困於先號聖人作而光於後命祖顛

皇中書令河東公厚德載庶物直心尹天下齊七政於璣
衡致一人於仁壽雖子孺之周密方進之通明不是過也
父爽皇贈朝散大夫鄜州司馬遜而守中敏以承德故有
臺之樂未寵於王庭而斯皇之榮遂飾於泉壤三代繼業
盛達公承累行之慶靈稟中和之粹氣粵自羈貫迨乎成
人轟其隄防森是矛戟直節以成果勇溫德而著令儀其
行已也恭其親師也謹其從政也恪其取友也義奉長者
之深誘不越中庸讀夫子之微言取其大畧公幼丁太夫
人艱襁褓之內若有所失景雲元年先帝在藩以公女兄

爲妃則申王之舅以外戚解褐授左金吾衛中候則知傅
昭儀之淑德載誕恭王李夫人之麗容是榮協律公循道
執一體正無貳不以怙寵而倨貴不以苟榮而屑禮無何
丁鄜州府君艱一粥之食杖而能起無時之號泣以繼血
先帝龍飛公猶在疚制令起復爲左領軍衛左郎將賜緋
魚袋腰經外除心喪內毀朝廷躉之開元二年申王以伯
舅重奏公爲本府左帳內典軍九年又遷右衛率府郎將
十年又轉剡王府諮議十三年加游騎將軍守左衛中郎
十八年定遠將軍守左清道率或參桂巖之文雅或握蘭

金匱要略卷之三十三
二十七
錡之兵權肅宮道則苟理之清和翊周廬則衛綰之醇謹
二十七年又加明威將軍守右武衛將軍上柱國賜紫金
魚袋任同許褚職惟萬歲戎旅孔循禁衛斯整煥彼章綬
崇其寵榮故一心事君凡遷徙官位不矯訐以沽譽不介
獨以轢羣所蒞必聞所適必當來有其惠去有其恩無潘
岳之一除免子文之三黜縉紳之士以爲美談以其年七
月遇疾彌留有加無間御醫驛路中使在門猶能正不溷
邪故巫覡莫進歿必合度故手足全歸以八月四日終於
長安開化里之私第春秋六十有一遺誠薄葬明主驚悼

久之詔使就第贈物三百段粟一石葬者量借手力縵幕
威儀簫鼓飾終之典斯爲盛矣以十二月二日歸窆於萬
洪固之原禮也羽儀道路觀霍葬之紛紛龍虎岡原見勝
城之鬱鬱公萬頃旁汪千尋直上碩量瑰材敏識甘節家
人莫見其喜愠時輩但美其風流其存也子罕之不貪其
歿也國僑之遺愛故樂棘斬焉謂之善居也金革不避謂
之從權也貴而不滿謂之鳴謙也仕而守節謂之公器也
疾而得正謂之知禮也終而薄殮謂之達道也詩曰人之
云亡邦國殄瘁其此之謂乎夫人王氏瑯琊郡君晝哭之

外屯喪字孤嗣子祐良等遑遑焉過禮之孝也哀哉碑篆
盡假於余柔翰徒施實慙於墨妙貞石既刻有愧於色絲
其詞曰

將軍本胄出自周後羽父諸族展禽食柳自茲保姓才與
時偶涉河居東賢哲代有鼎氣潛毓河精陰受降生將軍
百夫之首明鑒思瑩洪鐘待扣三紀典兵一心事后賢妃
之季名王之舅梁苑寵崇漢家恩厚朱軒繡軸金印紫綬
渥洼籥雲青萍衝斗位纔上將年未中壽遇疾徹懸全歸
啟手杜陵東陌秦原北阜旌轉城隅烟凝谷口屬屬孤允

哀哀孀婦松檟淺深岡巒左右通溝刻石天長地久嗚呼
將軍歿而不朽